

Fu posto le opinion di seriver a sier Piero Zen orator et vicebailo a Constantinopoli, la prima per sier Gasparo Malipiero, sier Sebastian Justinian el cavalier, sier Alvise Mocenigo el cavalier, sier Francesco Donado el cavalier procurator, sier Marco Foscari savi dil Conseio, sier Francesco Soranzo, sier Hironimo Querini savi a Terra ferma, sier Carlo Zane, sier Marco Antonio Querint, sier Zuan Battista Bernardo, sier Andrea Gradenigo savi ai Ordini, in risposta di soe di 11 fevrer, et si farà a di 7 marzo zerca riformar li capitoli di la pax etc. : che 'l vadi dal magnifico Imbraim et dirli di la candida fede nostra, et non bisogna, ma volendo confirmarli, li confirmi come fu fatto con suo padre per il qu. sier Bartolomio Querini et sier Alvise Mozenigo el cavalier orator nostro, con altre parole; però quando volesseno alterar inquirissa et ne avisi subito.

Et sier Pandolfo Morexini savio dil Conseio vol si scrivi una lettera a sier Tomà Contarini, va orator a Costantinopoli, solliciti il camin et uniti fazi con il Zen quanto è dito di sopra.

Et sier Filippo Capello e sier Marco Antonio Corner qu. sier Zuanne savi a Terra ferma, et sier Zuan Vetor Contarini savio ai Ordini vol una lettera a l' orator Zen *ut supra*, ma non digi nulla si dal bassà non li fosse o li sia sta richiesto risposta.

Et parloe primo sier Sebastian Justinian el cavalier, savio dil Conseio per l' opinion soa et di Savi ch' è la prima.

Et poi parloe sier Pandolfo Morexini savio dil Conseio per la soa, ma non era accepta al Conseio.

Et poi parloe sier Marco Antonio Corner et fe' una sapientissima renga per la sua opinion.

Da poi li rispose sier Francesco Donado el cavalier procurator, fazendo gran paura al Conseio a non prender la soa, et li rispose sier Filippo Capello per la sua opinion.

Da poi andò in renga sier Andrea Mozenigo dotor, fo avogador, contra le do prime, et contra parte di quella dil Corner, ma non fo aldito.

Et sier Pandolfo Morexini intrò in l' opinion dil Capello, Corner et Contarini. Andò le parte: 7 non sincere, 3 di no, 51 dil Morexini e altri, 137 di Savi et questa fo presa.

Fo posto poi, per tutti li Savi, tre letere al dito sier Piero Zen: per una che quanto se li scrive fo dato in comission a l' orator Contarini, si che al zonzer suo non aspetti altro, et hessendo zonto procedi unitamente.

Item, per l' altra, zerca la publication de la liga a stampa è chiarissimo non se haver impazato etc.

Item, per l' altra de questo zorno dil ricever di sue et avisarli el partir de l'imperotor de Zenoa, et dil convento si ha a far a Trento per li confini havemo col re de Romani. Ave no 166, et fu presa.

Fu posto, per li Savi di Terra ferma, scansar la spexa di fanti sono in Verona al presente numero.... siano reduti in 150 come erano prima, de quei 20 stanno a Lignago et sono forestieri etc., et siali mandà danari per darli una paga distribuendoli sotto quei capi. *Item*, di danari di le fabrieche fazino coperti a le caxe, a le porte, azio stagino li et nou in la terra. Ave: 157, 10, 7.

Fu posto, per li Savi tutti, una letera a sier Tomà Contarini, va orator al Signor turco, con mandarli la copia de quanto havemo comesso a l' orator Zen che exequissa la soa comission zerca li capitoli, et inanti zonzeno le letere uniti la exequissa et hessendo stà exequita non digi altro, ma quando el bassà volesse che 'l restasse fin havesse nostra risposta, debbi restar. Ave tutto el Conseio.

A dì 17. La matina, non fo alcuna lettera.

14

Vene in Collegio l' orator dil duca de Milan, diendo haver hauto lettere dil duca, zerca oio, et parlò in conformità di le letere ne scrisse li oratori nostri.

Da poi disnar, fo Collegio di Savi *ad consulendum*, et fo expedito le letere va a Costantinopoli, a Ragusi, et alcuni Savi volevano scriver zonto fuse l' orator Contarini a Costantinopoli, l' orator Zen venisse via, ma nulla fo scrito.

Dil duca de Urbin, fo lettere di Mantua al suo orator qui, et li manda la lettera de l' imperator: li scrive dar li contà de sora et è contento il iuramento vagli et servi la illustrissima Signoria per capitano zeneral. *Item*, come la duchessa mercore fo a di 9 de questo a hore una et meza di note li a Mantua parlorite uno fiol, si che soa excellentia mo ha fioli et figliole. Ha tolto la casa da Muran teniva affito el duca de Ferara, di sier Daniel et Nicolò Venier qu. sier Agustin, per ducati di fito a l' anno et la fa meter ad ordine, voleno venir a star il duca et la duchessa qualche di qui.

Morite hozi sier Zuan Foscari qu. sier Nicolò, qual za molti anni fo patron de l' Arsenal, de età anni 97, era el secondo vechio zentilomo de questa cilà perchè sier Francesco da Molin *da la Madalena* compie a di avostlo anni 98.

In questo poi disnar, tutti quelli da chà Braga-